

Noticia
Transparente
di Gobierno

ISLA ONLINE

Dialuna 24 Juni 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS




Gabinete Wever-Croes



Un otro joya di proyecto di Gabinete Wever-Croes

AEROPUERTO INTERNACIONAL REINA BEATRIX A CELEBRA E ENTREGA DI FASE 1A DI E PROYECTO GATEWAY 2030



Diabierna 21 di juni Prome Minister Evelyn Wever-Croes tawata presente na Aeropuerto Internacional Reina Beatrix pa celebra e entrega di fase 1A di e proyecto Gateway 2030 y pa e despedida di e actual CEO di AAA señor Joost Meijs.

Prome Minister a indica cu esaki ta e apertura di un sala nobo di US Departures, cual lo ta completamente operativo na comienso di 2025. E ta parti di e proyecto Gateway 2030 di e aeropuerto cu ta diseña pa mehora e facilidadnan di Aeropuerto Internacional Reina Beatrix y asina duna e miho servicio posibel na e pasahero. Ta trata di un facilidad moderno, espacioso y cu pinturanan di e artista local Armando Goedgefrag.

Riba e anochi aki tambe a tuma despedida di e actual CEO di Aruba Airport Authority N.V., señor Joost Meijs cu ta den e funcion aki desde 2019. Señor Meijs lo bandona su funcion na July 2024, unabes cu e termina cu su mandato di cinco aña. E mandatario a gradici señor Meijs pa su contribucion cu pais Aruba y a dese'e hopi exito den futuro.

“E sala nobo di US Departures ta un proyecto hopi bunita cu a cuminsa den nos Gobierno. Aeropuerto di Aruba a wak temponan menos bon durante e pandemia. Tawata temponan difícil y di hopi incertidumbre. Nos a dicidi di habri frontera atrobe y tur cos ta indica cu esaki tawata e miho decision pa Aruba. E tempo ey hasta AAA a proyecta cu Aruba lo ta bek riba pia te aña 2025. Cu hopi orguyo mi por bisa cu ya na 2022 a mira e recuperacion y na 2023 e recuperacion tawata completo. Awe por celebra e proyecto aki danki na tur ciudadano di Aruba cu semper ta traha duro pa hiba nos pais padilanti.

Pabien Aeropuerto Internacional Reina Beatrix pa e logro aki. Danki na colega Minister Dangui Oduber pa su vision y determinación y danki na tur e ekipo di AAA cu a haci esaki posibel. Esaki ta un otro joya di proyecto di nos Gobierno. Nos no a realisa tur nos metanan ainda, pero nos ta logrando si”, Prome Minister a termina bisando.

Prome Minister Evelyn Wever-Croes



Prome Minister Evelyn Wever-Croes: Gabinete Wever-Croes ta cumpli!

E PROYECTO "OPERATION COMMAND CENTER" A WORDO INAUGURA

**"E proyecto aki lo aumenta e siguridad di pais Aruba,
creando un miho luga pa biba y bishita"**

Diabierna ultimo, Prome Minister Evelyn Wever-Croes a asisti na e inauguracion di e "Operation Command Center", cu ta un proyecto hopi importante pa cuerpo policial, mirando cu e lo facilita nan trabou pa loke ta siguridad di pais Aruba. Un proyecto cu a tuma su tempo, pero cu awe ta ofrece e pida baranca aki e "Operation Command Center" mas moderno den region, consistiendo di funcionalidadnan integro y tecnologia avansa.

Prome Minister a indica cu Aruba a pasa den temponan hopi dificil debi na e pandemia, y e tempo ey comunidad completo a uni den determinacion pa saca e pais di e crisis, y traha pa hib'e padilanti. Cu e inauguracion di e centro aki, por mira bek cu tur e esfuerzo cu a wordo haci e tempo ey, awe a duna su fruto. Awendia pais Aruba ta gosa di un economia solido danki na e crecemento grandi di turismo, un porcentaje di desempleo mas abou, y un finanzas publico na ordo, segun institutonan manera CAft y IMF. Tambe segun un investigacion di The Telegraph di Inglatera, Aruba ta un di e paisnan mas safe den e region.

"Nos a saca nos pais di crisis, nos a stabilisa nos pais, y awor nos compromiso ta pa crea progreso y prosperidad pa tur ciudadano di nos pais" Prome Minister a expresa. P'esey e proyecto aki ta hopi importante pasobra e ta aumenta e siguridad di tur ciudadano, y unabes bo pais ta sigur, turistanan lo sigui bin, yudando asina e desaroyo y crecemento economico.

Mirando e presupuestonan cada aña, por tuma nota cu Minister di Finansa Xiomara Maduro semper a traha di cerca cu Minister di husticia Rocco Tjon pa asina aumenta e presupuesto di cuerpo policial, cu e meta pa crea un pais mas sigur pa tur ciudadano.

"Mi kier a felicita cuerpo policial, tur esnan cu ta bay labora den e centro aki, y esnan cu indirectamente lo bay probecha di e fruto di e centro aki. E "Operation Command Center" aki ta esun mas moderno den nos region y ta localisa na Savaneta. Mi deseo ta pa e centro aki, facilita e trabou di tur esnan cu tin cu percura cu nos pais ta sigur.

Tambe, mi kier gradici tur esnan cu a haci esaki posibel. Un



danki na Setar pa nan partnership y colaboracion den haci e centro aki un realidad hunto cu Gobierno. Aunke e no ta cu nos mas, mi ta gradici Señor Pourier (q.e.p.d), cu a traha hopi duro riba e proyecto aki, y cu awe no ta na bida pa wak e fruto di su trabou. Un danki tambe na ful e ekipo di Minsiter Rocco Tjon cu a traha hopi duro pa por a logra e metanan proponi, y na cuerpo policial pa kere den e proyecto y brasa e proyecto.

Aruba por ta hopi orguyoso cu e "Operation Command Center" aki, danki na e compromiso di cada un di boso. Para akinan mi no por keda sin menciona ex minister di husticia señor Rudy Croes (q.e.p.d) cu semper a soña di bin cu loke e tabata yama un central, consistiendo di ekiponan mas moderno, y mas innova pa yuda haci Aruba mas sigur. Awe danki na Minister Rocco Tjon, su soño a bira realidad. Den nomber di pueblo di Aruba, y den nomber di ex-minister Rudy Croes mi kier a bisa bo danki pa bo determinacion, y vision pa haci Aruba un luga mas sigur na unda nos tur por biba y lanta nos yiunan den dje. Nos no a logra tur loke nos a compromete nos mes pa logra pero nos ta logrando si", Prome Minister expresa.

DIA DI SAN JUAN



San Juan ta bin, San Juan ta bay
At'e cu e palo den su man,
cu su wowo bon mara,

24 di juni 2024



Gobierno di Aruba

BAN CELEBRA *Dera Gay*

Minister di Finansa y Cultura
ta invita Aruba en general pa asisti
na e actividad di **Dia di San Juan - Dera Gay**

JUNI
24

7:00 PM - 11:00 PM
**Centro di Bario Playa
Pabao**

JUNI
24

6:00 PM - 9:00 PM
**Centro di Bario
Brazil**

JUNI
24

5:00 PM - 9:00 PM
**Centro di Bario
Tanki Lender**

JUNI
24

6:00 PM - 11:00 PM
Sport Boys Club

JUNI
24

6:00 PM - 10:00 PM
**Centro di Bario
Savaneta**



Minister di Finansa y Cultura



Comision Celebracion Dianan Nacional




UNOCA



Departamento di Cultura Aruba



SETAR



ELMAR



WEB
WATER- EN
ENERGIEBEDRIJF
ARUBA N.V.



Aruba Tourism
Authority



UTILITIES ARUBA



ARUBA AIRPORT AUTHORITY



MINISTER MADURO DI FINANSA TA INFORMA CU ENTRADA EXTRA DEN PRESUPUESTO 2024 LO WORDO DESTINA PA MEHORA E PODER DI COMPRA DI VARIOS GRUPO DEN COMUNIDAD



Algun tempo atras Parlamento di Aruba a ricibi e Nota di Comienso di Aña 2024 y hunto cune e prome Presupuesto Supletorio pa aña 2024 cu ta contene e cambianan den maneho cu ta rekeri aprobacion di Parlamento. Un di e cambianan cu ta resalta ta e entrada extra cu a wordo realisa debi na e mehoracion di cumplimiento di pago di belasting y crecimiento economico. Minister Maduro di Finansa ta informa cu entrada extra aki den Presupuesto 2024 lo wordo destina pa mehora e poder di compra di varios grupo den comunidad.

INDEXERING

Ta conoci cu Gobierno a yega na un acuerdo cu sindicatonan pa indexa e salario di e empleado publico pa mehora nan poder di compra. Un parti di e indexering lo tuma luga den luna di juli 2024 y pesey den e prome Presupuesto Supletorio 2024 ta aloca fondo pa e indexering aki.

REPARATIETOESLAG

Den e Presupuesto Supletorio tambe ta aloca fondo pa asina por brinda trahadornan cu ta gana menos di 2500 florin y e pensionadonan di SVB un subida di e reparatietoelag.

BIJSTAND

Pa mehora e poder di compra di esnan mas vulnerabel den comunidad, den e Presupuesto Supletorio tambe ta aloca fondo pa asina por hisa e suma di bijstand pa esnan cu un limitacion.

TRAHADORNAN DI FUNDACION SUBSIDIA

Pa e trahadornan cu ta traha na Fundacionnan cu ta haya subsidio di Gobierno, den Presupuesto Supletorio lo pone fondo pa e Fundacionnan aki por ahusta e salario di nan trahadornan pa mehora nan poder di compra. E Fundacion subsidia pa Gobierno lo mester haci un peticion apart pa e

fondo extra y esaki lo wordo duna bou e condicion cu e fondo por wordo uza solamente pa gasto di salario y no pa otro gasto di e fundacion.

APROBACION DI PARLAMENTO

Minister Maduro ta spera cu Parlamento por aproba e prome Presupuesto Supletorio pa aña 2024 pa asina varios grupo den comunidad por keda yuda cu nan poder di compra. ■

Minister Maduro di Finansa ta informa:

CAFT TA CONCLUI CU ARUBA TA CUMPLI CU TUR NORMA FINANCIERO DEN AÑA 2023

Trabou serio ta duna resultado concreto y positivo na bienestar di Pais Aruba



Recientemente e colegio di supervision financiero CAFT a publica nan opinion riba e cifranan di e ultimo kwartaal di aña 2023 manera cu Gobierno a publica den e Uitvoeringsrapportage URK 4. En corto, CAFT ta conclui cu Aruba ta cumpli cu tur norma financiero den aña 2023. Ta trata di un surplus di 1% di GDP of mas, gasto di personal bou di 479 miyon florin y debe cu ta baha.

Surplus mas grandi cu 1% di GDP

Un norma financiero cu Aruba a acorda cu Hulanda pa mehora nos finansa publico ta, pa e sector colectivo por tin un saldo financiero di un surplus di 1% di GDP of mas. Den aña 2023, debi na crecimiento economico grandi, prudencia den presupuesto y diciplina presupuestario, a logra un resultado financiero positivo cu a hiba na un surplus di 4% di GDP pa

e sector colectivo di Aruba. Cu esaki Aruba ta cumpli cu e norma financiero pa por tin un surplus di mas di 1% di GDP den Presupuesto 2023.

Gasto di personal bou 479 miyon florin

Den aña 2023, e gasto di personal mester keda bou di 479 miyon florin. Asina mes cu Gobierno den aña 2023 a bay over na paga 100% di salario na e empleado publico, e gastonan di personal a suma 467 miyon florin kedando asina bou di e norma pa gasto di personal. CAFT ta remarca cu desde 2022 nan ta mira cu gasto di personal ta keda baha cumpliendo asina cu norma pa keda baha gasto di personal.

Debe ta baha conforme plan

E quota di debe a baha te na 79% di GDP den aña 2023, un bahada di 12 punto di porcentahe compara cu aña 2022. Cu esaki Aruba ta bon riba rumbo pa cumpli cu e norma di un quota di debe di 70% di GDP den aña 2027 y un quota di debe di 50% di GDP den aña 2039. Pues e debe di Aruba ta bahando conforme plan.

CAFT cu elogio pa Aruba

Den e raport riba e cifranan di e ultimo kwartaal di aña 2023, CAFT ta duna elogio na Gobierno di Aruba pa e resultado financiero positivo. E cifranan di e ultimo kwartaal di aña 2023 por wordo mira riba www.gobierno.aw y e raport di CAFT por wordo mira riba www.cft.cw. Minister Maduro ta gradici tur instancia y persona cu ta haci esfuerso grandi pa mehora e finansa publico di Aruba. Trabou serio ta duna resultado concreto y positivo na bienestar di Pais Aruba.

Oordeel

De vierde UR toont een voorlopig overschot in de collectieve sector van AWG 282 miljoen. Dat is 4,0 procent van het bruto binnenlands product (bbp). Aruba voldoet daarmee ruimschoots aan de norm voor het financieringsoverschot uit de LAft en het protocol^{2,3} en aan de voorgeschreven tekortcompensatie.⁴ Ook voldoet Aruba aan de personeelslastennorm en ontwikkelt de schuldquote zich in lijn met de afspraken daarover uit het protocol. Het CAft spreekt zijn waardering uit voor deze positieve resultaten en adviseert Aruba conform de LAft het gehele overschot in te zetten voor schuldaflossing aangezien het aangaan van nieuwe investeringen voor 2023 niet meer mogelijk is. Voor 2024 en verder adviseert het CAft de budgettaire ruimte prudent te benutten door lasten te beheersen en prioriteit te geven aan investeringen boven consumptieve uitgaven.

MINISTER DI CULTURA HUNTO CU CCDN DEN CONFERENCIA DI PRENSA EN CONEXION CU CELEBRACION DI SAN JUAN - DERA GAY 2024

Dialuna siman pasa na Fort Zoutman Minister di Cultura hunto cu Comision Celebracion Dianan Nacional a tene un conferencia di prensa pa informa riba e celebracion di San Juan – Dera Gay 2024. Na e conferencia aki tabata presente Minister di Cultura Xiomara Maduro, Presidente di Comision Celebracion Dianan Nacional Lyonel Dirksz, Representante di UNOCA, di Centro di Bario Savaneta, di Centro di Bario Tanki Lender, di Centro di Bario Playa Pabao, Gucci Dancers y di Sport Boys no por tabata presente.

Sr. Lyonel Dirksz, Presidente di Comision Celebracion Dianan Nacional a habri e conferencia y a anuncia e centronan di bario cu tin evento relaciona cu Celebracion di San Juan – Dera Gay 2024. Ela gradici UNOCA cu a duna extra sosten na e centronan pa por celebra e dia di San Juan.

Minister di Cultura a elabora riba e tradicion di San Juan, bishitanan cu su persona ta haci na scolnan. Ademá e mandatario a invita un y tur pa bishita e pagina www.coleccion.aw cu tin hopi informacion y historia di e Fiesta di San Juan – Dera Gay. Ademá e mandatario a informa riba su bishita na Cas Tan Tin caminda e por a aprecia e presentacion escolar organisa pa Departamento di Cultura, Cas Tan Tin y Cuerpo di Bombero. Minister Maduro a invita e pueblo pa celebra nos Fiesta di San Juan.

Sra. Peterson, Coordinadora di Proyecto na UNOCA a amplia riba e partnership di Unoca y CCDN. Ademá ela splica riba e proyecto “Diseña bo trahe di Dera Gay”. Ta trata di un tayer na unda nos muchanan ta wordo siña con pa traha un Trahe di Dera Gay. Esaki ta wordo duna pa Sra. Romelinda Maldonado.

Despues a toca oportunidad na e representantenan di e diferente Centronan di Bario e.o. Playa Pabao, Savaneta, Tanki Lender, Lago Heights, Gucci Dancers y Club Sport Boys cu a haci un invitacion na comunidad y tambe nan a duna informacion amplio riba nan programa di actividad relaciona cu e Celebracion di Dia di San Juan – Dera Gay 2024.

Pa Departamento di Cultura, Junior Arends a elabora riba proyecto Escolar di San Juan – Dera Gay 2024 pa scolnan cual a wordo organisa pa e departamento, Cas Tan Tin y Cuerpo di Bombero. E presentacion ta pa 32 scol preparatorio y basico te cu klas 3. Un total di 3600 muchanan durante e periodo di 10 di juni pa 20 di juni lo haya presentacion y conoce e historia y tradicion di cosecha y celebracion di San Juan. Ademá a a haci un yamada na comunidad pa no cende candela y ban evita peligro y proteha nos medio ambiente y nos bestianan.

Despues di e conferencia di prensa tabata tin un presentacion di Gucci Dancers riba e baile di San Juan, na unda Minister di Cultura tambe a participa den e baile di San Juan.





MINISTER DI TURISMO Y SALUD PUBLICO TA CONTENTO PA YAMA BON BINI NA "ISLAND FEST ARUBA" NA SAN NICOLAS



Minister di Turismo y Salud Publico sr. Dangui Oduber ta contento pa yama bon bini na "Island Fest Aruba" na San Nicolas. Durante un conferencia di prensa diaranson ultimo, Minister Dangui Oduber a invita nos bishitante y localnan pa bin experiencia e cultura, arte, gastronomia y musica local na e festival aki.

Island Fest Aruba ta un celebracion inolvidabel pa nos bishitante y localnan, unda nan por bin experiencia e esencia di "Zjeito". Esaki ta e manera nos localnan ta biba, mientras conectando cu e hospitalidad di nos hende nan Arubano. E festival aki ta un evento unda tur persona lo explora nos herencia, goza di nos tradicionnan y descubri pakico Aruba ta conoci como 'One Happy Island'.

Minister Dangui Oduber ta contento cu e festival aki lo tuma lugar tur ultimo diaranson di luna den e distrito di San Nicolas. San Nicolas ta considera como e capital di cultura, y lo tin e

honor di host e evento principal aki cu ta celebra Aruba su herencia y alaves ta famoso pa su murayanan yena cu artenan colorido.

Island Fest Aruba lo tin un lineup diversifica di musica bibo, mustrando e herencia musical di e isla. For di e ritmonan contagioso di musica tradicional Arubano, manera tumba y calypso. E festival ta promete di tin un variedad di bendedoranan di cuminda, artesanian y mucho mas.

Como Minister di turismo y salud publico e kier felicita ful e team di Island Fest Aruba pa continua cu e evento aki cu semper tabata exitoso y ta invita ful Aruba pa bin disfruta di nos musica, arte y cumindanan local dia 26 di Juni.

Hunto ban demostra e hospitalidad di nos hendenan y kico ta haci Aruba un hoy den Caribe.

PROGRAM JUN 26	
6:45-7:15	Tipico
7:30-8:00	Historical Show
8:00-8:55	Joyride Band
9:00-10:00	Tsunami
10:00	Closing

Island Fest ARUBA

Ministry of Tourism and Public Health

ARUBA



MINISTER GEOFFREY WEVER TA SALI AWE (DIALUNA) CU DELEGACION COMERCIAL PA SURINAM



Despues di algun luna di preparacion awenochi Minister di Asuntonan Economico, Comunicacion y Desaroyo Sostenibel, Geoffrey Wever, Camara di Comercio Aruba (KVK), Departamento di Asuntonan Economico Comercio y Industria, y Aruba Trade & Industry Association (ATIA) hunto cu delegacion comercial ta sali awe, dialuna, pa Surinam pa un Trade Mission te cu dia 28 di juni.

Hunto cu e delegacion Minister Wever kier explora e posibilidadnan di comercio cu Surinam y asina purba stimula mas actividad comercial entre e dos Paisnan.

Surinam, manera ta conoci, ta un pais cu ta exporta azeta, oro, metal, palo, productonan pa construccion y mucho mas. P'esei e importancia di bai hunto como delegacion ta demostra tambe e interes y e seriedad di e mision aki. Comerciantenan local lo haya e oportunidad pa network, combersa y intercambia

ideanan cu diferente comerciante Surnameño na Surinam.

Durante e estadia di Minister Wever y su delegacion lo topa cu diferente mandatarionan di Surinam durante e Trade Mission aki manera Sr. Chandrikapersad Santokhi Presidente di Surinam, Minister di Agricultura, Bestia y Pesca Sr. Parmanand Swedien, Minister di Economia, Empresarial y Innovation Sr. Rishma Kuldipsingh, Minister di Transporte, Comunicacion y Turismo Sr. Uraiqit Ramsaran, Minister di Finanzas Sr. Kermechend Stanley Raghoebarsing. Banda di esaki lo bishita tambe Suriname Investment & Trade Agency y diferente compania di transporte na Surinam.

Minister Wever kier a gradici KVK, DEZHI y ATIA pa nan empeño pa por haci e mision comercial aki posibel y tur comerciante cu ta parti di e mision comercial.

MINISTER GEOFFREY WEVER A DUNA PRESENTACION DI SUSTAINABLE DEVELOPMENT GOALS NA ALUMNONAN DI PIUS X SCHOOL

Den cuadro di e proyecto di Minister Geoffrey Wever di presentacion di e metanan di desaroyo sostenibel, e ‘Sustainable Development Goals (SDGs)’, na alumnonan di 6e klas di scolnan basico, e biaha aki a bishita klassen 6 di Pius X School. Henter e scol Pius X a sali pa ricibi y bon bini Minister Wever.

Di un manera interactivo Minister Wever a splica e metanan di desaroyo sostenibel na e alumnonan. E presentacion ta pa yuda cu conscientisacion di kico e metanan ta encera y con cada un di nos por yuda na logra e metanan. For di e alumnonan tabatin basta interes y entusiasmo pa e topico.

E Metanan di Desaroyo Sostenibel ta consisti di 17 metanan riba cual paisnan ta traha pa alcanza den nan contexto nacional. E metanan ta: 1. Caba cu pobresa; 2. Caba cu hamber; 3. Salud y bienestar; 4. Enseñansa di calidad; 5. Igualdad di genero; 6. Awa limpi; 7. Energia limpi y economico; 8. Trabou decente y crecemento economico; 9. Innovacion y infraestructura; 10. Reduci desigualdad; 11. Barionan y comunidannan sostenibel; 12. Produccion y consumo responsabel; 13. Accion riba clima; 14. Bida bou awa; 15. Bida riba tera; 16. Paz, husticia y institucionnan formalisa; 17. Partnership pa logra e metanan.

“Mi ta hopi contento y ta agradeci e cabesante, docentenan y alumnonan di Pius X School pa e caluroso bon bini”, Minister Geoffrey Wever.



Minister Geoffrey Wever:

SEMINARIO "PODER FINANCIERO: E CAMINDA PA BO CAS"



Diasabra cu a pasa, e seminario organisa hunto cu Fundacion Plan di Bida y Bold Properties, "Poder Financiero: E Caminda Pa Bo Cas" a tuma luga, atrayendo un gran cantidad di participante. Esnan presente a muestra hopi interes den e topiconan presenta, siñando di e rekisitonan y consideracionnan ora di busca of construi nan propio cas, y mas importante ainda, un hende mester sa unda y con por busca informacion adicional.

Minister Geoffrey Wever a duna un discurso pa habri e evento, encurashando tur pa sea determina y strategico den nan buscada pa yega na un cas propio. "Mi deseo ta pa tur hende residencia na Aruba yega un dia nan nan propio cas, no solamente como obheto di inversion pero especialmente como centro di nos famia, unda nos ta comparti y convivi cu nos pareha, yiunan, famia y amigonan."

E seminario, teni na Renaissance Convention Center, a enfoca riba e proseso y rekisitonan pa yega na un cas na Aruba. E ta intenta di empodera e comunidad cu informacion valioso tocante e derecho y cualificacionnan necesario pa bira doño di un cas cu por yuda nan planifica efectivamente pa nan futuro inversion.

Minister Wever a expresa su satisfaccion di por contribui na e seminario aki, cual a ser brinda gratis pa tur esnan cu a registra y participa. A destaca e importancia di educacion financiero, cual ta un prioridad pa su maneho. "Ministerio di Asuntonan Economico ta sigui organisa diferente actividadnan

pa promove educacion financiero na beneficio di e comunidad", e mandatario a expresa. "Mi ta agradecido na Sra. Paloma Tromp y e ekipo di Fundacion Plan di Bida, na Jenniffer Guzman y Aileen Kelly y henter e ekipo di Bold Properties, tur e sponsers y tur speaker, pa un tremendo evento."


Conocemento ta un prome paso importante na yega na bo propio hogar, p'esei educacion financiero ta esencial pa empodera nos hendenan. "Poder Financiero: E Caminda Pa Bo Cas" tabata un experiencia valioso pa ur presente, y mi ta spera pa algun por conduci na resultadonan positivo den nan bida pa realisa nan soño", minister Wever a comenta.

SINTONISA

CONFERENCIA DI PRENSA DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM





OPERATION COMMAND CENTER NA SAVANETA A BIRA UN REALIDAD

Diabierna atardi, durante un momento ameno, a inaugura oficialmente e “Operation Command Center” situa na Savaneta. Minister di Husticia y Asuntonan Social sr. Rocco Tjon, conhuntamente cu Minister President sra. Evelyn Wever-Croes, Korpschef y representante di Setar a hiba palabra pa asina duna inicio na e apertura oficial di e edificio nobo pa loke ta e operation command center, cual ta bay contribui na eleva siguridad riba nos isla.

Segun e mandatario, siguridad no ta algo cu ta bin di su mes, como pais mester inverti den departamentonan hudicial pa por garantisa siguridad. No ta trata di inverti solamente den material y infraestructura, pero mas importante ainda ta pa inverti den tecnologia y recursonan humano, pues e hende cu mester haci e trabou.

E vision di ministerio di husticia y asuntonan social, ta pa garantisa siguridad pa pais Aruba, y e vision aki ta consisti di cuater pilar. Un vision integral cu ta conta cu aportacion di ful e veld hudicial, alabes den su ehecucion cu participacion tambe di e stakeholders hudicial.

E prome dos pilarnan, cual ta material y infraestructura ta importante pa crea e condicionnan adecua pa e polisnan por haci nan trabou manera debe ser. Esaki ta influencia e motivacion di e personal positivamente. E ultimo encuesta bou di personal di Cuerpo Policial a indica tambe cu nan ta mas motiva cu prome.

Sinembargo, e ultimo dos pilarnan ta loke ta haci e diferencia pa como organisacion, especificamente como Cuerpo Policial, por sigui desaroya y atende cu e demanda cu ta bin, riba nivel local pero tambe internacional. Aki ta trata di inversionnan den e pilar di tecnologia y desaroyo di e Agentenan Policial.

E importancia di inverti den e dos pilarnan aki ta bira bisto door cu criminalidad ta keda cambia, e ta tuma otro formanan, y como pais nos departamentonan mester por adapta na e cambionan aki. Pa e motibo ey Cuerpo Policial ta den un reorganizacion, pa proyectonan manera esaki, por yuda e Cuerpo adapta y na mes momento garantisa su existencia pa futuro door di ankre den e estructura di e organisacion.



Aruba tin e centro di mas moderno den ful nos region y esaki no solamente door di e inversionnan den material y infraestructura, pero tambe door di e hecho cu ta trata di un colaboracion entre diferente entidadnan di Cuerpo Policial mes, pero tambe entre Cuerpo Policial y otro departamentonan den e cadena hudicial.

Den e edificio aki lo wordo ubica central di polis, radar kamer, y tambe e operadornan pa loke ta trata camara surveillance. Camara surveillance a inicia na 2022 y actualmente tin mas di 250 camera instala rond di nos isla. Den area di hotel, downtown San Nicolaas, y 40 localidad strategico rond di nos isla. Banda di esaki, lo inicia cu instalacion di camaranan den downtown Oranjestad.

Continuacion OPERATION COMMAND CENTER NA SAVANETA A BIRA UN REALIDAD....

E relevancia di e inovacion aki ta cu e trabou di Cuerpo Policial lo bira mas eficiente y eficaz, ta bay garantiza orden publico mucho mas miho y tambe percura pa mas caso wordo resolvi y mucho mas lihe. A traves di e proyecto aki por garantiza e propio seguridad di nos Agentenan Policial mucho mas miho.

Pa Cuerpo Policial por sigui desaroya di e forma aki e mester tin un bon fundeshi, e fundeshi aki pa Cuerpo Policial a wordo basha door di polisnan cu a eherce e trabou aki hopi aña atras y aworaki ta gosa di nan pensioen, nos ta gradici cada un, pasobra sin e fundeshi aki un proyecto manera esaki tampoco lo tawata posibel.

Por ultimo, minister Tjon a gradici tur esnan cu a haci esaki posibel, esta Setar N.V. especificamente sr. Stanley Pourrer den feliz memoria. Un persona hopi dedica, pasiona y professional. E Proyecto di camara ta uno cu ya caba for di 2022 nos ta bezig cune y Stanley tawata envolvi for di comienso.

Palabranan di gratitud y pabien na Cuerpo Policial, Coleganan Minister cu a aloca fondo tambe pa un proyecto di e magnitud aki. Parlamento di Aruba, pa aproba e diferente presupuestonan den cual ful e Proyecto integral pa loke ta camara surveillance a wordo presenta. Como tambe, na henter ministerio di husticia y asuntonan social. Proyectonan asina ta solamenta posibel danki na boso dedicacion, perseverancia y lealtad. ■■■■





MINISTER ENDY CROES TA FELICITA E 17 EMPLEADONAN DI ARUBA WINE AND DINE CU A RICIBI NAN DIPLOMA

Diamars merdia, Minister Endy Croes a atende e ceremonia di graduacion di 17 empleado di Aruba Wine and Dine cu a termina nan curso cu exito. Durante 12 siman e empleadonan di dicho compania a asisti na e curso di Stichting Vakbekwaamheid Horeca (SVA) pa waiter, unda cu nan a ricibi curso di entre otro, con pa atende cu cliente pa mehora servicio, hospitalidad y etiquette. E proposito ta pa mehora e servicio na e clientenan: tanto turista como local.

E mandatario di Enseñansa y Deporte tabata presente na Que Pasa Restaurant, unda el a hiba palabra y felicita e empleadonan cu e logro aki. Despues di e discurso, Minister Endy Croes a haci entrega di diploma na e empleadonan. "Danki na Aruba Wine and Dine cu a percura pa organisa e curso di capacitacion aki y brinda e enseñansa corecto na cada un di e empleadonan. Alabes, mi ta felicita e empleadonan cu e logro aki y ta desea nan hopi exito", Minister Endy Croes a finalisa.



MINISTER ENDY CROES TA FELICITA E STUDIANTE NAN DI ARTE CULINARIO DI COLEGIO EPI CU A PASA NAN EXAMEN FINAL EXITOSAMENTE



Recientemente, Minister di Enseñansa y Deporte Endy Croes hunto cu directora general di Colegio EPI Sra. Ankie Danker, Sra. Tisa LaSorte di Aruba Hotel and Tourism Association (AHATA), Sr. Clay Shipley di directiva di Dienst Publieke Scholen (DPS), familiar y demas invitadonan tabata presente na e examen final di e studiantenan di Arte Culinario di Colegio EPI. Den ocasion special aki, Minister Endy Croes a hiba palabra, deseando e studiantenan hopi exito. Un total di 18 estudiante di e estudio Arte Culinario a prepara alrededor di 10 delicioso plato.



Sra. Danker a indica cu e studiantenan aki ta den fase final di nan estudio y dia 1 di juli 2024 lo celebra nan graduacion. Sra. Danker a expresa cu e ta sumamente orguyoso di e studiantenan y ta gradici tur docente y chef di Colegio EPI cu a contribui den nan desaroyo. Sra. LaSorte a indica cu e sector di horeca tin necesidad di koki y chef pasiona cu por ofrece nos local- y turistanan un experiencia inolvidabel. Finalmente, Minister Endy Croes ta felicita e studiantenan di Arte Culinario cu a prepara diferente plato exkisito durante nan examen final y ta desea nan hopi exito den nan futuro carera. Alabes, e mandatario di Enseñansa ta felicita e docentenan cu a guia e studiantenan durante e proceso aki y cu ta forma parti di nan logro. ■■■



Minister Endy Croes: A INAUGURA E SCOL CHILDREN'S HOUSE MONTESSORI NA PARADERA



Diabierna atardi, Minister di Enseñansa y Deporte Endy Croes hunto cu su kerida esposa, maestro, alumno y famia a acudi na Children's House Montessori na Paradera. Na yegada, Minister Endy Croes a ricibi un caluroso bonbini di Sra. Jahaira Boekhoudt- Piña, kende ta directora di e scol. Durante e ocasion special aki, Minister Endy Croes a duna un discurso, felicitando e team cu a independisa y inaugura e scol bou di un nomber nobo. Na aña 2014 nan a habri porta di nan prome localidad na Dakota. Tres (3) aña atras, e scol a habri su di dos localidad na Paradera bou di e nomber Nos Fortalesa Montessori y diabierna ultimo a inaugur'e oficialmente bou di e nomber Children's House Montessori. Den e prome aña a inicia cu un total di 18 alumno di e edad di 6 pa 12 aña.

Den e di dos aña, e scol a crece cu un total di 36 alumno y di tres aña cu un total di 39 alumno. E metodo di Montessori ta diferente cu e sistema tradicional cu nos conoce na Aruba. Den un klas di Montessori, ta brinda e alumnonan diferente material y actividad, unda nan por haci nan mesun escogencia y traha riba nan propio tempo. E actividadnan aki ta contribui pa e alumno desaroya diferente habilidad entre otro, habilidad pa resolve problema, habilidad motorico y creatividad, door di proporciona material practico di aprendisahe. Ademas di esaki, ta stimula e alumnonan pa desaroya habilidadnan social, pa medio di enseñansa interactivo y weganan cooperativo.

E meta di Children's House Montessori ta pa educa e comunidad di Aruba tocante e metodo Montessori y su beneficiaran. Montessori ta fundamental pa biesestar di e muchanan y e muchanan ta fundamental pa e desaroyo continuo di Montessori globalmente. Finalmente, Minister Endy Croes ta felicita directora Jahaira Boekhoudt-Piña y e team completo di Children's House Montessori cu e gran apertura di Children's House Montessori y ta desea nan hopi exito.



DIRECTORA JOSELIN CROES DI GABINETE DI ARUBA NA FAMILYDAY UNESCO

Directora di Gabinete di Aruba mr. Joselin Croes tabata presente na un UNESCO Familyday na Utrecht. Na e ocasion aki a toca temanan di importancia di UNESCO na e islanan pa loke ta herencia historico y cultural pero tambe discriminacion y libertad di expresion.

Asina durante di e familyday tabata tin un Masterclass riba e tema con ta combati discriminacion y racismo. Esaki a consecuencia di e mission di UNESCO pa igualdad y paz mundialmente.

Bou guia di Marlon Titre di comision di UNESCO Nederland a tuma lugar un UNESCO Cariben Quiz riba e rol di UNESCO den e parti Caribense di Reino Hulandes na unda a enfoca riba e aña conmemorativo riba e historia di sclavitud cu ta yegando su final.

Joselin tabata contento di tambe a topa cu studiantenan Joey Francisco y Imani Janga cu lo bai core stage na UNESCO Aruba. Relaciona cu esaki Joseline a topa cu Birgit Kreykenbohm, Program Specialist Communication and Information di UNESCO cu lo guia e studiantenan durante di nan stage.





Gabinete Wever-Croes

Murayanan na San Nicolas, cu un tempo tawata silencioso y senciyo, a bira inspiracion pa creatividad dinamico di varios artista. Cada arte di muraya ta un celebracion di diversidad, cultura y union, dunando bida na murayanan y transforma nan den obranan maestro.

2024

AÑA DI STABILIDAD Y PROSPERIDAD